

四庫全書

史部

欽定四庫全書

宋名臣奏議卷二十七

宋 趙汝愚 編

帝系門

皇后上

上英宗乞不沉於諸臣家為潁王擇妃

韓 維

臣累日以來傳聞禁中沉至諸臣之家為潁王擇妃審

如此者臣竊以為非便臣聞夫婦者居室之大倫將以正家則承宗祀以繼萬世之嗣故禮之用惟婚姻為兢兢兢兢者謹之至也坊記曰諸侯不下漁色故君子遠色以為民紀此言諸侯不得自於其國網取容色若捕漁然所以推遠女色為民之紀法也伏以皇子潁王孝友聰明動履法度方嚮經學以觀成德今卜族授室其繫尤重臣愚以為宜歷選勲望之家謹擇淑哲之媛考古納采問名之義以禮成之不宜苟取華色而已近世

簡棄禮教不以為務婚娶之法自朝廷以達民庶蕩然
無制故風俗流靡犯禮者衆賢士大夫未嘗不發憤歎
息竊幸國家有以振之今陛下始初清明為元子求婦
而姑出苟簡殆非所以矯世勵俗反之雅正且無以示
頴王使知室家之道在德而不在色也傳稱尤物足以
移人詩詠淑女幾以配上此誠智士仁人見微知終遠
覽禍福之原為世戒也陛下不可不加聖意焉

治平元年上時

為諸王府記室參軍直集賢院治平三年三月始納故
相向敏中孫女為皇子頴王婦即欽聖憲肅皇后也

上英宗乞下太常禮院修撰潁王聘納儀範

邵元

臣伏觀皇子潁王天資卓茂婚媾及期方陛下即政之初而元嗣克家之日推之於禮莫重於斯臣等伏見國朝親王聘納雖開寶通禮具存舊儀而因循未嘗施行至有敲門羊酒鎮櫃錢銀乃里巷之常談蓋搢紳之不得道行於聖旦竊所未安欲乞降聖旨下太常禮院博約舊典修撰潁王聘納儀範其故事非禮者一切罷之

治平

三年二月上時為潁王府翊善疏奏詔令禮院詳定聞
奏禮院奏開寶通禮親王納妃有納采問名納吉納成
請期親迎同牢之禮國朝所未嘗用今檢到國
朝會要皇親婚禮物數請如會要故事從之

上宣仁皇后乞蚤擇后而素教之

彭汝礪

臣竊以古者能治其國非獨修諸已者備也內亦有助焉
后妃夫人能輔佐君子非獨天性然也教亦有素焉后
妃人君之配也天下國家安危治亂宗廟社稷之禍福
子孫之賢不肖是繫豈特其身哉此可謂甚重以天下

之責以聖人之事望于一未笄之女子此可謂甚難然則擇之可不謹乎擇之必知所以教之自寒而暑非一日之積也則教之所以成物亦必有漸矣禮女子十年不出姆教婉婉聽從執麻枲治絲繭織紵組紃學女事以供衣服觀於祭祀納酒漿籩豆菹醢禮相助奠詩曰后妃在父母家則志在於女功之事恭儉節用服澣濯之衣尊敬師傅則可以歸安父母化天下以婦道也古之人其教之也素故其成也至詩曰誰其尸之有齊季

女祭祀婦事齊欽母道自其幼時婦事母道非其教之素
曷能與於此周南之治盛以其志為卷耳其効為桃夭
其化為兔舄其德為漢廣觀原反本固有所在臣以謂
皇帝陛下春秋富盛宜蚤擇淑德之女以定后妃之位
以明天下之教以正天下之本以對天之丕顯休命立
師傅保姆嚴宮室車服制度環佩之節陳圖史之戒非
正之聲音顏色使不得亂其視聽非正之玩好使不得
至其前及其歸也凡所欲皆其所嘗聞之者也凡所享

皆其所嘗安之者也凡所惡皆其所戒焉者也此可謂
善矣以陛下之神明博大得賢妃之助其治天下國家
何有詩曰天監在下有命既集文王初載天作之合文
王嘉止大邦有子天立厥配受命既固周既受命至配
立而後言固則人主所以待內助如此然則擇之豈可
不謹教之豈可不早夫教之非豫也使得其人幸而已
矣幸非可以為法也苟非其人禍莫甚焉凡臣之言稱
其辭則小稽其事則緩察其微則甚切惟太皇太后陛

下留意毋忽

元祐四年五月上
時為中書舍人

上宣仁皇后論納后宜先知者四事

范祖禹

臣伏奉詔旨皇帝納后六禮令翰林學士御史中丞兩
省給舍與禮部太常寺官同共詳議臣竊伏思此乃國
家大事萬世之福祚所繫風化所先自古聖王重之今
陛下宜先知者有四不可不謹也臣謹稽之上古參之
後世為陛下悉數而詳言之一曰族姓二曰女德三曰

隆禮四曰博議所謂族姓者臣聞古之帝王所與為婚姻者必大國諸侯先聖王之後勲賢之裔不然則甥舅之國也不以微賤上敵至尊故其福祚盛大子孫蕃昌昔黃帝娶於西陵之女是為嫫祖為黃帝正妃其子孫皆有天下五帝三王皆黃帝之後也高辛娶陳豐氏之女是生帝堯虞舜娶帝堯之二女釐降于媯汭遂有天下大禹娶於塗山是生夏啓天下歸之子孫享國四百七十餘年成湯娶于有莘氏子孫有天下六百餘年周

之先祖后稷生於姜嫄世有賢妃太王娶太姜是生王季王季娶太任是生文王文王娶太妣其禮尤盛大雅歌之曰文王初載天作之合言文王之初有識天已生賢女為之配也又曰大邦有子覩天之妹文定厥祥親迎于渭造舟為梁不顯其光自古婚禮未有如文王之盛也太姜炎帝之後也太任太昊之後也太妣大禹之後也太妣生十子武王周公皆聖人也其餘皆為顯諸侯周之子孫徧於天下太妣之德也詩人美文王之聖本

由太任其詩曰思齊太任文王之母思媚周姜京室之婦太姒嗣徽音則百斯男又曰刑于寡妻至于兄弟以御于家邦言文王之化自家及國以正天下也周南關雎后妃之德人倫之始風化天下皆美太任太姒也武王亦娶于姜是生成王周有天下三十餘世八百餘年其基本蓋由此也故族姓不可不貴所謂女德者臣聞禮本夫婦詩始后妃治亂因之興亡繫焉三代之興皆有賢妃其亡也皆有孽女夏之興也以塗山其亡也以

妹喜商之興也以有娥其亡也以妲己周之興也以姜
嫄其亡也以褒姒此皆聖賢所紀詩書所載垂之後世
以為永鑒者也秦漢以後婚姻多不正無足取法惟後
漢顯宗明德馬后唐太宗文德長孫后憲宗懿安郭后
皆有后德出於勲賢之家其餘敗亂足以為戒而已恭
惟本朝太祖皇帝以來家道正而人倫明歷世皆有聖
后內德之助自三代以來未有如本朝家法也皇帝聖
德明茂睿質純粹天監在下必生聖女以佑皇家惟陛

下遠觀上古近鑒後世上思天地宗廟之奉下為萬世子孫之計選卜窈窕以母儀萬國表正六宮非有德孰可以當之然閨門之德不可著見必視其世族觀其祖考察其家風叅以庶事亦可知也昔漢之初大臣議欲立高帝子齊王皆曰王母家駟鈞惡戾虎而冠者也代王母家薄氏君子長者乃立代王是為文帝文帝為漢之賢王亦由其母家仁善也故女德不可不先所謂隆禮者臣聞天子之與后猶天之與地日之與月陰之與

陽相須而後成者也禮曰天子聽男教后聽女順天子
理陽道后治陰德教順成俗内外和順國家理治此之
謂盛德又曰天子修男教父道也后修女順母道也孔
子對魯哀公曰古之為政愛人為大所以治愛人禮為
大所以治禮敬為大敬之至矣大昏為大大昏至矣大
昏既至冕而親迎親之也是故君子興敬為親舍敬是
遺親也弗愛不親弗敬不正愛與敬其政之本與哀公
曰寡人願有言然冕而親迎不已重乎孔子愀然作色

而對曰合二姓之好以繼先聖之後以為天地宗廟社稷之主君何謂已重乎又曰天地不合萬物不生大昏萬世之嗣也君何謂已重焉蓋深非之也孔子遂言曰昔三代明王之政必敬其妻子也有道妻也者親之主也敢不敬與禮又曰元冕齊戒鬼神陰陽也將以為社稷主為先祖後而可以不致敬乎又曰敬而親之先王之所以得天下也今臣與衆官討論講議皆約先王之禮參酌其宜不為過隆願陛下勿以為疑進言者必曰

天子至尊無敵於天下不當行夫婦之禮而荀卿有言
天子無妻告人無匹也如此則是周公之典孔子之言
皆不可信而荀卿之言可信也臣謹按禮冠昏唯有士
禮而無天子諸侯之禮故三代以來唯以士禮推而上
之為天子諸侯之禮蓋以成人之與夫婦自天子至於
士則一也臣竊聞親王宗室之間娶妻殊無齊體之禮
敬而親之之義天下豈有獨尊而無配偶者哉至於鄙
慝之禮或雜戎蠻之俗或習委巷之風下自士族上流

宮禁有涉於此者願陛下一切屏絕之以正基本以先天下故禮不可不隆所謂博議者臣聞古者天子聘后上公逆之諸侯主之故春秋書祭公來遂逆王后于紀夫國有大事大臣不容不預聞也昔慈聖光獻之立也呂夷簡定其議故其詔曰覽上宰之敷言其冊曰宗公鼎臣誦言于朝先是茶商陳氏女亦預選擇王曾宋綬皆以為言大臣繼有言者遂罷陳氏仁宗所以為聖者能從衆也進言者必曰此陛下家事非外人所預自古

誤人主者多由此言也天子以四海為家中外之事孰非陛下家事大臣無不可預之事亦無不當預之人且陛下用一執政進一近臣必欲協天下人望況立皇后以母天下乎臣恐陛下一日降詔云立某氏為皇后則大臣雖有所見亦難乎議論矣今陛下之所選擇莫若出其姓氏宣問大臣若聖志既定而衆議僉同則卜筮協從鬼神其依天人之意無不同矣故議不可不博臣幸備勸講其職在以帝王之事裨益聖德故敢獻其所聞臣之愚誠惟中

宮正位之後四海之內室家相慶則宗社之福也狂瞽

之言惟陛下留聽

元祐五年十一月上
時為給事中兼侍講

上宣仁皇后論立后當采用德閥不當勦選

呂希純

臣竊以天子之與后猶日之與月陰之與陽相須而後成是以自古聖主有婚姻之始皆博訪令族參求有德然後昭告宗廟成以昏禮其敬謹重正如此詩人推原周家受命之本上陳姜嫄周姜太任太姒之賢皆聖賢

之後大邦之子其盛德不回其徽音可繼故輔其君子
世世修德昭受天命厯年長久未聞以聘納之際參以
陰陽數術者也三代禮文雖不盡見然禮記及周禮儀
禮述大昏之義列媒妁之職載六禮之儀稍為詳備畧
無男女年命勘婚文以至漢唐而下史策所載亦無此
制本朝制司天之官雖有婚書然自祖宗以來每建中
壺皆采用德閥不專以勘選為事且宣祖皇帝方在側
微天作之合固未嘗集太史而議年命也然而昭憲太

后實生太祖太宗為萬世福是豈勘婚之力哉其婚書
詞義鄙淺及日官元不自信臣所慮者自降選后指揮
已是逾歲誕聖年月其誰不知除日前供到家狀猶或
可信外若今日以後更令餘家供析安知不改易女命
以求附會雖盡合書法豈復可憑則恐論議遲遲徒為
過謹曠日持久無益而已皇帝於后妃之議方當謙抑
不言太皇太后推慈愛之念固欲盡衆美以副宸心然
則股肱大臣亦宜以身任其責況即今公卿士大夫之

家例不勘婚人雖有貴賤之殊其於親愛蓋亦同爾乃
敢斷然不用者豈非以勘合年命為難信畧去拘忌為
安便邪為人臣者固當推己之所安以事君上不可如
卜祝之論姑以逃責而已故臣敢因緣職事輒貢瞽言
伏惟聖慈少賜裁擇

元祐六年上
時為太常丞

上哲宗論納后儀制

范祖禹

准中書錄黃三省樞密院奏臣寮議到納后
六禮文字令同共看詳擬定逐項合行儀制
五禮命使今欲以都亭驛權為皇后行第發
冊命使其日皇帝服通天冠絳紗袍御文德

殿命使奉迎皇帝臨軒與冊禮使副同日遣
皇后入內皇帝服通天冠絳紗袍御福寧殿

臣竊以都亭驛常為遼使館舍今納皇后以母天下而
先居之於遠人之館恐非所以觀示四方為正始之道
也臣愚欲乞詳酌以舊尚書省權為行第又臨軒發策命
使奉迎及皇后入內皇帝皆服通天冠絳紗袍臣謹案古
昏禮用冕服無他服之文通天冠絳紗袍本以代古皮
弁之服唐開元禮國朝開寶通禮亦皆服衮冕發冊與
奉迎同日將以為天地宗廟社稷之主繼先聖之後其

可以不致隆乎伏請皇帝臨軒發冊命使奉迎及皇后
入內並服袞冕以重大昏之禮伏望聖慈更下三省樞
密院參酌庶於國體為便合於先王經禮之意所有錄
黃未敢行下謹具封還伏候勅旨

貼黃議者或謂昨來發太皇太后冊寶止服通天
冠絳紗袍今納皇后服冕有踰尊之嫌臣謹案冕
服祭服也弁服齊服也故南郊致齊服通天冠絳
紗袍祭之日乃服袞冕冕服所以交神非所以事

親也昏禮將以為天地宗廟社稷之主有鬼神陰陽之義故服祭服與事親之禮不同即無踰尊之嫌臣與鄧伯溫等議狀已備論之今服通天冠絳紗袍於禮無所據臣竊惜聖朝講明一代大典而於先王之禮無據則未足為法也伏乞更賜詳酌

元祐六年八月上時

為給事中兼侍講

上哲宗進家人卦解義

范祖禹

臣近以權住經筵久不進講陛下今月一日已御通英

又先降聖旨過端午不住講讀此見陛下好學之至也而臣自五月以後北郊奉祠未獲入侍伏觀中宮初建將行嘉禮實為正始之道王化之基恭惟本朝祖宗家法自三代以還蓋未之有由漢以下皆不及也今陛下納后以承天地以奉祖宗內盡孝養外美風化將以為萬世法臣愚竊為陛下重之謹按周易家人之卦乃聖人所以定天下之端本臣輒不自揆敢撰集所聞先聖先賢遺言為解義一篇謹錄上進以代奉事伏望聖慈

少賜省覽

臣祖禹曰家人之道以內為主女正則家正矣故其利在女之貞彖曰家人女正位乎內謂六二也男正位乎外謂九五也六二以柔得位而居中九五以剛得位而居尊男子居外女子居內男不言內女不言外男女之正莫大於此此天地之義陰陽之分也禮曰天子聽男教后聽女順天子理陽道后治陰德天子聽外治后聽內職教順成俗外

內和順國家理治此之謂盛德故天子之與后猶
日之與月陰之與陽相須而後成者也其可以不
正乎天子者天下之君也諸侯者一國之君也父
母者一家之君也君不可以不嚴天子則天下之
所嚴也諸侯則一國之所嚴也父母則一家之所
嚴也故家人有嚴君焉父母之謂也父得父之道
則慈子得子之道則孝兄得兄之道則友弟得弟
之道則恭夫得夫之道則義婦得婦之道則聽如

此然後家道正推而行之以治天下故正家而天下定矣舜文王是也舜事父母瞽瞍底豫而天下之為父子者定象憂亦憂象喜亦喜而天下之為兄弟者定釐降二女于媯汭嬪于虞而天下之為夫婦者定文王孝於王季太任刑于太姒友于兄弟以御于家邦大學曰心正而後身修身修而後家齊家齊而後國治國治而後天下平象曰風自火出家人何謂也離火也巽風也火在內而風在

外家人之道由內以相成故文中子曰明內而齊外也君子之居家也言必有物行必有常所以為家人法也孔子曰君子居其室出其言善則千里之外應之況其邇者乎居其室出其言不善則千里之外違之況其邇者乎言出乎身加乎民行發乎邇見乎遠言行君子之所以動天地也可不慎乎初九曰閑有家悔亡何謂也處家之初治家之始故必防閑之然後悔可亡王弼曰凡教在初而

法在始當治之於未變嚴之於未瀆也既變而後治之既瀆而後嚴之則悔矣孟子曰身不行道不行於妻子君子言有物行有恒無僻志無妄好所以閑家也昔者桀惑於妹喜故夏亡紂惑於妲己故商亡幽王惑於褒姒故周亡晉獻公惑於驪姬三世大亂唐高宗制於武后唐祚中絕中宗制於韋后身陷大禍皆不能閑之於初也閑之在於人心未變之時故象曰閑有家志未變也六二曰无

攸遂在中饋貞吉何謂也坤之文言曰地道也妻
道也臣道也地道无成而代有終也陰不為倡陽
不為和故坤道柔順承天而時行妻道无攸遂在
中饋則正而吉矣古者女子十年不出姆教婉婉
聽從執麻枲治絲繭織紵組紃學女事以供衣服
觀於祭祀納酒漿饗豆苴醢禮相助奠后妃在父
母家則志在於女功之事恭儉節用服澣濯之衣
尊敬師傅故關雎美后妃之德其職在於供苻菜

備庶物以奉宗廟又當輔佐君子內有進賢之志而無險詖私謁之心闕睢之化行則諸侯之夫人采蘋于沼沚用之公侯之事大夫之妻亦采蘋藻盛之筐筥湘之錡釜以供祭祀之用皆无攸遂在中饋之事矣三代之亡皆以孽女亂政不修其職而預外事故武王數紂曰古人有言曰牝雞無晨牝雞之晨惟家之索今商王受惟婦言是用詩人刺幽王曰哲夫成城哲婦傾城婦有長舌維厲之

階亂匪降自天生自婦人又曰赫赫宗周褒姒威
之皆反此者也九三曰家人嗃嗃悔厲吉婦子嘻
嘻終吝何謂也以陽處陽居下卦之上為家人之
長剛嚴者也王弼曰行與其慢寧過乎恭家與其
瀆寧過乎嚴故家人嗃嗃至於其悔雖危猶不失
吉婦子嘻嘻言笑無節終必有吝凡家之道主於
嚴敬故象曰家人嗃嗃未失也婦子嘻嘻失家節
也六四曰富家大吉何謂也以陰處陰體柔居巽

少長有禮各得序以聽於上故象曰順在位也
富者非富以財而已家之富人之肥也禮曰父子
篤兄弟睦夫婦和家之肥矣其大吉不亦宜乎九
五曰王假有家勿恤吉何謂也陽居君位以家道
治天下者也聖人以天下為一家以中國為一人
故視天下如家視百姓如身愛人如愛身治天下
如治家孔子曰身以及身子以及子妃以及妃君
行此三者則愾乎天下矣大王之道也如此國家

順矣孟子曰天下之本在國國之本在家家之本
在身正身所以治人正家所以治天下也舜舉八
元使布五教于四方父義母慈兄友弟恭子孝內
平外成此以家道治天下而四海之內莫不交相愛
也詩曰之子于歸宜其家人大學曰宜其家人而
後可以教國人先王欲正天下必自家始此家人
之盛也故勿恤而吉王弼曰王至斯道以有其家
古之人有行之者舜文王者是也上九曰有孚威

如終吉何謂也以陽居上處家之終誠發於中而著於外人皆信之故曰有孚治家之道初則閑之終則嚴之者所以常久也孔子曰君子不重則不威傳曰有威可畏謂之威揚雄曰貌重則有威又曰或問何如動而見畏曰畏人何如動而見侮曰侮人夫見畏與見侮無不由己又曰人必其自敬也然後人敬之君子之道本諸身故治家者始於修身終則反諸其身其身正而天下歸之矣身處

威敬人亦畏敬之夫如是豈有不終古者乎故象

曰威如之吉反身之謂也

元祐七年五月上時
為禮部侍郎兼侍講

宋名臣奏議卷二十七

欽定四庫全書

宋名臣奏議卷二十八

宋 趙汝愚 編

帝系門

皇后下

上仁宗論廢郭皇后

段少連等

臣因義激心以職獲譴天地容載蒙幸何深然理有所未伸情有所未達鬱悒之志敢不盡陳之初聞非時召

兩府大臣議皇后入道一日之內都下喧然以為皇后
母儀天下固無入道之理翊日又聞兩府列狀乞降后
為淨妃臣與孔道輔范仲淹等恐詔命一行難於追復
是以羣詣殿閣上疏而執政進說使臣等不獲面對止
令就中書商量宰相雖知其誤然猶責臣等翻覆率易
故道輔仲淹斥守外郡臣等例皆蒙罰伏以陛下親政
以來進用直臣開闢言路天下無不懽忻一旦以諫官
御史伏閣遽行黜責中外皆以為非陛下意蓋執政大

臣假天威以黜道輔仲淹而斷來者之說也望熟思其事使讒慝不行忠邪有別則天下幸甚又伏覩戒諭自今有封章宜如故事密上毋得羣詣殿門請對且伏閣上疏豈非故事今遽絕之則國家復有大事誰敢旅進而言者況道輔仲淹端正敢言素為姦邪所忌以言事而黜之恐姦邪得志而翔翔方正望風而竄伏矣昔唐陽城王仲舒伏閣以雪陸贄之罪崔元亮叩殿陛理宋申錫之冤當時稱之今陛下未忍廢出皇后而兩府列狀

議降為妃諫官御史敢廢伏閣之事而默默乎陛下深
惟道輔等所言為阿黨乎忠亮乎幸裁赦之

明道二年
十二月上

時為殿中
侍御史

上仁宗論廢后有大不可者 段少連

臣聞高明粹精凝德無累者天之道也然氛祲蔽翳晦
明偶差乃陰陽之沴爾象天德者君之體也治陰陽者
臣之職也陛下秉一德臨萬方有生之類莫不浸涵德
澤而氛祲蔽翳偶差晦明以累聖德者由大臣懷祿而

不諫小臣畏罪而不言臣獨何人敢貢狂瞽哉誠以秉
愛君之心竊痛陛下履仁聖之具美乏骨鯁之良輔因
成不忍之忿又稽不遠之復臣是以瀝肝膽披情素為
陛下澄清氛祲蔽翳之累易曰夫夫婦婦而家道正正
家而天下定矣詩云刑于寡妻以御于家邦若然則君
天下修化本者必自內而刑外也昨者二府大臣忽然
晚出民間喧傳皇后被譴而入道矣又傳降為妃而離
宮廷矣臣與道輔等皆在言職以謂皇后母儀萬方非

有大過而動搖則風教陵遲況聞入道降妃之議出自臣下且妃后有罪出則告宗廟廢則為庶人安有不示之於天下不告之於祖宗而陰行臣下之議者乎且皇后以小過降為妃則臣下之婦有小過亦當降為妾矣此抗章請對不蒙賜召豈非姦邪之人離間陛下邪臣等赴中書時執政之臣備言皇后有妬忌之行始議入道終降為妃兼云有上封者慮皇后不利於聖躬故築修高垣置在別館臣等備言中外之議以為未可願速

降明詔復中宮位號以安民心翌日詔出乃云中宮有
過掖廷具知特示含容未行廢黜置之別館俾自省循
供給之間一切如故臣未審黜置別館為后乎為妃乎
詔書不言安所取信伏以陛下立后一紀有餘而輔臣
倉卒以降黜之議惑於宸聽搢紳循默無敢為陛下言
者臣所謂氛祲蔽翳以累聖德者蓋臣職有曠矣夫皇
后動搖有大不可者二執政之臣獨不念之且内外臣
寮以至戚里皆萌覬覦之心或進女口以希選納或巧

事寵愛以結內援則使陛下惑女色而亂紀綱紀綱之亂變故以生社稷可得安乎易曰三人行則損一人一人行則得其友斯大不可者一也陛下舉事為萬世法苟因掖庭爭寵遂行廢后則何以書史策而示子孫況祖宗以來未嘗有廢后之事詩云無念爾祖聿修厥德斯大不可者二也臣竊恐姦佞之人引漢武幽陳皇后故事以諂惑陛下且漢武驕奢淫佚之主固不足踵其行事而為人臣者當致君堯舜豈當致君如漢武哉今

皇后置在別館必恐懼修省且陛下仁恕之德施於天下而獨不加於中宮乎古人言曰一人向隅滿堂為之不樂今四方凶年民有愁嘆又聞中宮幽廢何啻滿堂不樂乎願詔皇后歸宮復其位號杜絕非間待之如初天地以正陰陽以和人神共歡豈不美哉陛下苟為邪臣所沮不行小臣之議臣恐高宗王后之枉必見於他日宮闈不正之亂未測於將來惟聖神慮焉

明道二年十二月上

上仁宗論廢嫡后逐諫臣

富弼

臣聞右司諫秘閣校理范仲淹以上章諫廢后事貶睦州通判仍差人押出門臣不勝驚駭伏恐陛下行於倉卒未熟思慮輒敢冒天威犯斧鉞一陳愚懇惟陛下裁察之皇后自居中宮不聞有過陛下忽然廢斥物議騰踊自太祖太宗真宗撫國凡七十年未嘗有此陛下為人子孫不能遵祖考之訓而遂有廢后之事治家而尚不以道奈天下何仲淹為諫官所以極諫者乃其職也陛下何故罪之假使所諫不當猶須含忍以招諫諍况

仲淹所諫大愜億萬人心陛下又縱私忿不顧公議
取笑四方臣甚為陛下不取也昔莊憲臨朝陛下受制
事體大弱而莊憲不敢行武后故事者蓋賴一二忠臣
救護使莊憲不得縱其欲陛下可以保其位實忠臣之
力也今陛下始獲暫安遂忘舊日忠臣羅織其罪而譴
逐之陛下以萬乘之尊設廢一婦人甚為小事然所損
之體則極大也夫廢后謂之家事而不聽外臣者此唐
姁臣許敬宗李世勣諂佞之辭陛下何足取法陛下必

欲廢后但可不納所諫何必加責以重己過今匹庶之家或出妻亦須告父母父母許然後敢出之今陛下貴為天子莊憲山陵始畢墳土未乾便以色欲之心廢黜后氏而不告宗廟是不敬父母也今陛下舉一事而獲二過於天下廢無罪之后一也逐忠臣二也此二者皆非太平之世所行臣實痛惜之莊憲太后臨朝以劉從德死恩典太重臺諫曹修古等四人連名上章極諫莊憲大怒陛下不得已遂貶此四人然心甚惜其去莊憲

纔往陛下立行召命優與恩獎復處憲省修古雖死厚
加贈典如此者蓋陛下憐其忠鯁不避夫禍難爾今仲
淹所諫又甚於修古等所陳修古等追用而仲淹黜棄
陛下何所見前後之異也况仲淹以忠直不撓莊憲時
論冬仗事大正君臣之分陛下以此自擢用之既居諫
列或聞累曾宣諭使小大之事必諫無得有隱是陛下
欲聞過失雖古先聖哲之主亦無以過此今仲淹聞過
遂諫上副宣諭之意而反及於禍是陛下誘而陷之不

知自今後何以使臣雖日加宣諭諫臣以仲淹為戒必不信矣諫臣不諫大非朝廷之福今百執事所為皆一司一局雖常才者皆能幹之是易為也如仲淹者乃為臣之難能者也令幹一司一局者皆坐取遷陟立居顯要而仲淹不惜性命為陛下論事而遠徙外郡臣恐百辟以此皆務為易者而不為難者也陛下一旦有難為之事不知何人為陛下為之居諫官者務要訐直乃號稱職依違者曠職今循默者已居顯要而訐直者尚居

散地苟如是不若廢諫官如不欲廢即循默者可黜許
直者可用請陛下急圖之今天下凶歉盜賊如麻國用
空虛人心惶擾姦雄觀此已有窺覷之心陛下當兢兢
惕惕宵衣旰食日與臣寮講論安天下之計猶恐不及
而乃自作弗靖廢嫡后逐諫臣使此醜聲聞於四方知
陛下不納諫臣朝政不舉則姦雄益喜以謂中外皆亂
事勢相符必有變事臣一念至此心寒骨顫此自然之
兆固非臣之臆說也望陛下審思之明察之廢后已行

雖未能悔過臣願陛下急且追還仲淹復其諫職減二過之一庶乎諫路不絕朝綱復振使姦雄不能窺陛下

淺深此社稷之慶也

明道二年十二月上時為將作監丞范仲淹到睦州謝表言廢后事

臣昨聞中宮搖動外議喧騰以禁庭德教之尊非小故可廢以宗廟祭祀之主非大過不移初聞入道之言則臣遽上封章祈寢誕告次聞降妃之說則臣相率伏閣冀回上心議方變更言亦翻覆臣非不知逆龍鱗者擬璫粉之禍忤天威者負雷霆之誅理或當言死無所避蓋以前古廢后之朝未嘗致福漢武帝以巫蠱事起遽廢陳后宮中殺戮三百餘人後及巫蠱之災延及儲貳至宣帝時有霍光妻者弑許后而立其女霍氏之釁遽為赤族又成帝廢許后呪詛之罪乃立飛鸞姊妹妬甚於前六宮嗣息盡為屠宮至哀帝時理之即皆自殺西

漢之祚由此傾微魏文帝寵立號妃譖殺甄后被髮塞口而葬終招反報之殃唐高宗以王皇后無子而廢武昭儀有子而立既而推毀宗室成竊號之妖是皆寵衰則易搖寵深則易立也臣慮及幾微詞乃切直乞存皇后位號安於別宮暫選有年德夫人數員朝夕勸導左右輔翼候其遷悔復於宮闈杜中外覲望之心全聖明終始之德按仲淹當日奏疏世無傳本故附見其表

上哲宗論瑤華之獄不當付閹宦之手

陳次升

臣伏觀詔書以皇后孟氏旁惑邪言陰挾媚道迨從究驗證左甚明而陛下斷以大義不牽私恩奉承兩宮慈

訓廢皇后孟氏為華陽教主降詔以告中外命下之日士庶惶惑謂后無可廢之罪而陛下廢之咸相與為之咨嗟彈指良可歎也蓋以所治之獄不經有司雖聞追驗證左而事迹祕密朝臣猶不預聞士庶惶惑固無足怪臣竊謂后之廢立事體至重非若臣下一言一眚廢之逐之不足深恤自古推鞠獄訟皆付外庭未有宮禁自治高下付閹宦之手陛下但見案牘之具耳安知情罪之虛實萬一寃濫為天下後世譏笑臣欲乞陛下親

選在廷侍從或臺諫官公正無所阿附之人專置制院
別行推勘庶得實情如后之罪在所不容雖廢之人自
無言今事不經有司獄成閹宦此天下人心不能無疑
也伏望聖慈特降睿旨施行

紹聖三年九月上
時為殿中侍御史

上哲宗乞追停賢妃劉氏冊禮別選賢族

鄒浩

臣聞禮曰天子之與后猶日之與月陰之與陽相須而
成者也天子理陽道后治陰德天子聽外治后聽內職

然則立后以配天子安得不謹今陛下為天下擇母而
所立乃賢妃劉氏一時公議莫不疑惑誠以國家有仁
祖故事不可不遵用之耳蓋皇后郭氏與美人尚氏爭
寵致罪仁祖既廢后不旋踵并斥美人所以示公也及
至立后則不選於妃嬪必選於貴族而立慈聖光獻所
以遠嫌也所以為天下萬世法也陛下以罪廢孟氏與
廢郭氏實無以異然孟氏之罪未嘗付外雜治果與賢
妃爭寵而致罪乎世固不得而知也果不與賢妃爭寵

而致罪乎世亦不得而知也若與賢妃爭寵而致罪則并斥美人以示公固有仁祖故事存焉若不與賢妃爭寵而致罪則不立妃嬪以遠嫌亦有仁宗故事存焉二者必居一於此矣不可得而逃也況孟氏罪廢之初天下孰不疑賢妃必為后及讀詔書有別選賢族之語又聞陛下臨朝慨歎以廢后為國家不幸又見宗景有立妾之請陛下怒其輕亂名分而重賜譴責於是天下始釋然不疑陛下立后之意在賢妃也今果立之則天下

之所以期陛下者皆莫之信矣載在史冊傳示萬世不免上累聖德可不惜哉且五霸者三王之罪人也其葵丘之會載書猶且曰無以妾為妻況陛下之聖高出三王之上其可忽此乎萬一自此以後士大夫有以妾為妻臣寮糾劾以聞陛下何以處之不治則傷化敗俗無以為國治之則上行下效難以責人孔子曰名不正則言不順言不順則事不成事不成則禮樂不興禮樂不興則刑罰不中刑罰不中則民無所措手足名之不正

遂至民無所措手足其為害可勝道哉尤不可不察也
臣伏觀陛下天性仁孝追奉謨烈惟恐一毫不當先帝
之意然先帝在位動以二帝三王為法斥兩漢而下不
取今陛下乃引自漢以來有為五霸之所不為者以自
比是豈先帝之意乎是豈繼志述事所當然者乎此尤
公議之所未喻也臣觀白麻內再三言之者不過稱賢
妃有子及引永平祥符立后事以為所咨之故實臣請
論其所以然者若曰有子可以為后則永平中貴人馬

氏固未嘗有子也所以立為后者以冠德後宮故也祥符中德妃劉氏亦未嘗有子也所以立為后者以鍾英甲族故也又況貴人之系實為馬援之女德妃之時且無廢后之嫌其與賢妃事體迥然異矣若曰賢妃冠德後宮亦如貴人鍾英甲族亦如德妃則何不於孟氏罪廢之初用立慈聖光獻故事便立之乎必遷延四年以待今日果何意邪必欲以此示天下天下果信之邪兼臣聞頃年冬享景靈宮賢妃實隨駕以往是日雷作其變

甚異今又宣麻之後大雨繼日已而飛雹又自告天地
宗廟社稷以來陰靈不止以動人心則上天之意益可
見矣陛下事天甚謹畏天甚至尤宜思所以動天而致
然者攷之人事既如彼求之天意又如此安可不留聖
慮乎夫成湯聖君也仲虺不稱其無過而稱其改過不
吝高宗賢君也傅說不告以拒諫而告以從諫則聖臣
雖至愚不足以方古諫者常念唐太宗猶有恥君不及
堯舜之臣況直可以為堯舜如陛下之聖而於身親見

之乎是以不敢愛身冒犯天威圖報陛下親自識拔天恩之萬一而區區血誠盡於此矣惟陛下俯從而改之不以爲吝則萬世之下所以誦陛下之聖者亦將在成湯高宗之上矣豈不美哉伏望聖慈深賜詔納不以一時改命爲甚難而以萬世公議爲足畏追停冊禮別選賢旗如初詔施行庶幾上答天意下慰人心爲宗廟社稷無疆之計不勝幸甚

元符元年九月上
時爲翰林學士

宋名臣奏議卷二十八

欽定四庫全書

史部

宋名臣奏議卷二十九至三十二

詳校官侍講臣王燕緒

編修臣裴謙覆勘

總校官進士臣繆琪

校對官中書臣金光悌

謄錄監生臣黃廷璧

欽定四庫全書

宋名臣奏議卷二十九

宋 趙汝愚 編

帝系門

嬪御

上仁宗乞序正宮掖

龐 籍

臣前月十一日曾上封奏為內侍韓從禮等傳美人尚
氏教旨令開封府放免工匠單慶等六人本行差遣事

特蒙悉聽科斷韓從禮等及敕下諸司今後宮闈教旨
並不得施行中外聞之孰不歡快有以見陛下英斷實
九廟無疆之休四海永安之福也臣愚更願陛下使宮
掖之間上下有序不以恩寵陰啟禍階蠹耗金珠漸困
國力通私謁以亂政縱外親而干法上損聖德次紊朝
綱實天下幸甚

景祐元年四月上
時為開封府判官

上仁宗論宮禁五事

孫沔

臣聞虞舜治家而納麓姬文刑寡而御邦周南歌闕睢

之德仲尼刪詩著為三百篇之首魯史先經以紀元妃
丘明直書為十二公之始易以風自火出為家人之象
言號令之行乎外由中正而明于內非嚴風火之威則
難以正于家矣禮云身修而家齊家齊而國治國治而
天下平王政之本基乎此矣是知先聖懼眊情之為患
而立教於將來者也恭以皇帝陛下仁深溥博明達照
臨好善無厭從諫弗弗紹三朝之謨訓躬萬幾之憂勤
旰食在念將二十年雖古之聖帝明王致志行事無以

過也今朝無專權之臣上無失道之事然而陰陽未和災變未息法令不行恩威不著者豈治內之道有所未至歟臣不欲迂闊引喻前古願以聞見五事而陳之若以言獲罪臣之職也伏以中宮正位德配至尊主治陰教為天下母三妃九嬪世婦御妾上下分統無使僭差百世不易之論也伏自景祐已來三黜寵闡兩犯宸扆蓋所起幽微不勝恩遇身貴則性悍福極則患生退屏繼跡踰僭如舊苟不建立嚴制竊恐漸生厲階昨見上元

嘉節內庭出遊美人才人多不隨從飛蓋蔽景流車激
霆各崇華衛分道爭行衆目共觀與后為並此非所以示
外而垂範者也臣乞今後貴品嬪御等並令修備禮節戒
約奢侈常隨皇后出入不得各排儀衛輒自矜越仍乞選
擇端嚴近上夫人一兩員立為宮師以佐內則所冀上下
有別而中外不惑矣竊以宮政之設內職是先尚書侍
御司記典言一百二十人則為大備故先朝之數侍史
不過五百人俸給止于千二十貫皆有紀律不甚奢盈

今聞十倍增人已踰二三千十倍添俸或至二十萬私
身養女數復過之百司供億簿書可知一歲之中所用
何極非所以示節儉也臣乞取索宮中諸院宮人及私
身養女都大數目呈取進止若非遊幸之所宜令檢勘
合用人量留外並放歸本家任從其便而請給之數現在
者宜節減其半此所以消幽曠之氣而省財廩之費也
竊以內侍之職最為親近宣傳國命出納王言常行抑
制尚或騰陵今遷秩不踰年賞賜無虛日甲第連坊名

園接畛玉帛盈於後房絲竹聞於別院官尊祿厚職重
貲多若不立之儀式必恐亢於寵榮臣欲乞御藥依舊
只用二貲御帶押班都知並乞選擇謹重公嚴勤畏舊
有心力者充三年一遷官不許非次改轉未有嗣者令
養蔭一子則內無久貴之人下有進身之路亦一代之
永制也竊以勾陳九重華蓋萬乘垣直太紫庭儼雲龍
非深嚴不為尊非禁戒不為備闌入則抵罪誤至則伏
誅使內言不出於閫外言不入於閫所以防未然而限

中外也今上之起居言語衆無不知帷箔宴遊外無不傳內降斜封坦夷若道免刑要賞響應如神皆由左右之人出入為地邇臣頗邪能伺動靜迎合巧中率用斯道若不早辨以防微竊恐長姦而忽變臣欲乞應合入內及聽喚中人並用五十已上十五已下者諸宮院子須限七十已上分定番次上下不得參雜出入仍令內東門司專切點檢其暗祗候俳優人及公主院擔子官各放歸本營所有內道場乞今後斷絕此則整肅於宸

庭足以輝光於史牒竊以王者所須歲終不會此天下之財天子用之有司不得而吝也其或出納不謹支費不節豈可容姦不詰其敝今御寶憑由司內東門劄子取諸庫犀王金銀錢帛一歲至三百餘萬貫但有入內之名不知所用之處此數既多不可悉記昨聞胥吏偽取庫金三十兩抵法况御寶是中禁所掌外人何計而詐得之竊恐前後妄用非此一吏也乞差不干礙公幹有心力臣寮置司將寶元後來係御寶憑由及內東門

劄子取左藏庫等金銀犀玉錢帛大數對簿帳及謝恩表狀造作文曆并內藏庫亦自寶元後來內中支使金寶錢帛都數逐件磨勘即見無涯費用積久欺弊仍乞今後諸宮閣凡有取索出到憑由劄子先下內侍省都知入內覆奏然後置簿抄上番換通簽正牒下諸庫藏方得支官物不得直行取索或更別設關防節減用度亦經久之利也此五事者實政教之本源昇平之基業也中宮正則內宰之制行于六宮而寵嬖不犯於上矣

宮禁嚴則中間之事絕于衆口而朋黨不結於外矣宮人不減則用度不給怨曠以感陰陽之沴矣內侍不禁則威柄不一引薦以來邪佞之類矣御寶不嚴財貨不計則盜詐公取而無慮矣噫恩能勝威昵可消正甘言令色遜于志先意希旨會其事仁愛浸深忍情難決非至聖至明不可免也伏望皇帝陛下以公道制私情大日月之輝發雷霆之斷柔媚不干於聰明愛倖盡決於道義則何患天下之不治哉書曰威克厥愛允濟易曰

揚于王庭剛決柔也傳曰振也愆焉得剛非用天之剛
健中正則於斷也難矣今吳賊侵軼西鄙攻守臣未敢
進一策蓋儒者不知兵不可預言也若大臣盡心諸將
用命恐亦未為大患也夫手足之疾侵于皮膚積為瘡
瘍發于指掌未有所損也心腹之疾迫於膏肓壅為癰
疽潰于頭目不可卒救也此五事措置得宜則有無窮
之福此五事因循弗舉恐為不測之慮履霜至于堅冰
然火在於積薪非一朝一夕之故也惟斷之在不疑行

之恐不及動無失機間不容髮則百世之利萬方之幸
此皆陛下家事非人臣所得及也至於政教之綱紀未
舉輔相之心德未同朋黨之邪正未分著位之材愚未
辨進賢難於起死去佞過於拔山法令撓於親恩賞及
於濫豈不謂根蘖於內而斤斧不施者乎若聖人一慮
及此則庶事自正其條例悉數之名俟聰明聽然其說
異日為陛下言之也臣素非博識惟盡愚誠不歷詆於
羣公不專攻於上德但慮切直速怨貴權不能保身貽

憂老母至於事君之心則無所愧矣伏望夙夜之餘再

賜詳覽幸甚

慶厯元年正月
上時為左正言知諫院

上仁宗乞止絕宮人出入

孫沔

臣伏見芳林園南宅見安故豫王靈輿至三月初三日
方行攢殯諸宮奠酌慰禮已畢今見大內車蓋出入朝
暮往還非全痛戚之情頗涉朋遊之便道途窺覘僕御
喧譁禁士縱欲嚴呵宮人難於檢察誠為隱暗亦合防
微伏恐姦細乘時駭機竊發人之所忽事不可知伏諒

陛下以苦切在中周思未及臣叨司視聽須至達聞欲
乞指揮故豫王本宮人在彼祇候朝夕祭奠餘並止節
勿令輒出深為利便

慶厯元年
二月上

上仁宗論美人張氏恩寵宜加裁損

歐陽脩

臣近風聞禁中因皇女降生於左藏庫取綾羅八千匹
染院工匠當此大雪苦寒之際敲冰取水染練供應頗
甚艱辛臣伏思陛下恭儉勤勞愛民憂國似此勞人枉

費之事必不肯為然外議相傳皆云見今染練未絕臣
又見近日内降美人張氏親戚恩澤太頻臣忝為諫官
每聞小有污損聖德之事須合力言難避天譴臣竊見
自古帝王所寵嬪御若能謹儉柔善不求恩澤則可長
保君恩或恣意驕奢多求恩澤則皆速致禍敗臣不敢
遠引古事只以今宮禁近事言之陛下近年寵尚氏楊
氏余氏苗氏之類當其被寵之時驕奢自恣不早裁損
及至滿盈今皆何在况聞張氏本良家子昨自脩婉退

為美人中外皆聞以謂與楊尚等不同故能保寵最久
今一旦宮中取索頓多恩澤日廣漸為奢侈之事以招
外人之言臣不知陛下欲愛惜保全張氏或欲縱恣而
敗之若欲保全則須常令謙儉不至驕盈臣料八千匹
綾羅必非張氏一人獨用不過支散與衆人而已乃是
枉費財物盡為衆人中外譏議則陛下自受以此而言
廣散何益昨正月一日曹氏封縣君至初五日又封郡
君四五日間兩度封拜又聞別有內降應是疎遠親戚

盡求恩澤父母因子而貴可矣然名分亦不可太過其
他疎遠皆可減罷臣謂張氏未入宮之前疎遠親戚各
皆何在今日富貴何必廣為閑人自招謗議以累聖德
若陛下只為張氏計亦宜如此況此事不獨為張氏大
凡後宮恩澤太多宮中用度奢侈皆是污損聖德之事
繫於國體臣合力言伏望聖慈防微杜漸早為裁損慶
厯

二年上時
為知諫院

上仁宗論女御以御寶白制除才人

范師道

臣聞禮以制情義以奪愛常人之所難惟聰明睿哲之主然後能之近以宮人數多出之此盛德事也然而事有繫風化治亂之大而未經留意者臣敢為陛下言之竊聞諸閤女御以周董育公主御寶白制並為才人不自中書出誥而掖庭覬覦遷拜者甚多周董之遷可矣女御何名而遷乎才人品秩既高古有定員唐制止七人而已祖宗朝宮闈給侍不過二三百人居五品之列

者無幾若使諸閣皆遷則不復更有負數矣外人不能
詳知止謂陛下於寵幸太過恩澤不節爾夫婦人女子
與小人之性同寵幸過則瀆慢之心生恩澤不節則無
厭之怨起御之不可不以其道也且用度太煩須索太
廣一才人之俸月直中戶百家之賦歲時賜予不在焉
况誥命之出不自有司豈盛時之事耶恐斜封墨敕復

見於今日矣

嘉祐四年六月
上時知諫院

上英宗論後宮等級

司馬光

臣聞王化之興始於閨門故易基乾坤詩首關雎前世皆
擇良家子以充後宮位號等級各有負數祖宗之時猶有
公卿大夫之女在宮掖者其始入宮皆須年十二三以下
醫工診視防禁甚嚴近歲以來頗隳舊制內中下陳之人
競置私身等級寢多無復限極監勒牙人使之雇買前
後相繼無時暫絕致有軍營市井下俚婦女雜處其間
不可辨識此等置之宮掖豈得為便臣常念此不勝憤惋
今陛下即位之初百度惟新嬪嬙之官皆闕而未備臣

謂宜當此之時定立制度依約古禮使後宮之人共為
幾等等有幾人若未足之時且虛其貲數既足之後不可
更增凡初入宮皆當幼年未適人者若求乳母亦須選
擇良家性行和謹者方得入宮傳之子孫為萬世法此
誠治亂之本禍福之原不可以為細事而忽之

嘉祐八年十二

月上時以天章閣待制知諫院

上神宗乞減放宮人

錢顗

臣伏以歷代聖明之君臨御四海之初必有甚美之事

以順人情必竭至誠之心以感天意陛下紹膺大寶憂
勤庶政有弊必去聞善必行然猶陰陽未和災異數見
豈聖化有所不洽者耶臣竊伏思其一端臣恭聞仁宗
及英廟兩朝之間見在宮人尚多幽閑掖庭豈無怨隔
之思以汨和氣臣伏乞陛下特軫宸衷沛然下詔法祖
宗開寶祥符之制量數放出務令從便無曠時之苦有
遂性之樂上足以感天意下足以順人情哲王懿範莫
過於此也

熙寧元年上時為
殿中侍御史裏行

上神宗乞罷十閣之制

呂誨

臣竊聞去年下京東買黃金數萬兩本路科率太暴民頗怨之又廣南新錢監許買真珠上京傳說將備宮中十閣用度蓋愚者無知因其民言造為端意謂陛下春秋富盛祥禪既除將邇聲色漸求暇逸此其惑也臣有以知聰明睿知以天下為心必不留神於此爾然重思之天下有道庶人不議明盛之朝不當使民如是論議似亦啟之有因不可不卹也臣職在言責敢不為陛下

一一而陳之臣聞宮禁職位自有班序十閣創置非古儀也或云仁廟晚年欲廣繼嗣諛言闕間遂成其事英宗踐阼因循舊制真作無益害有益也何則既名閣分則異嬪御供具之外仍置官管幹增長事勢動有踰僭且禮之所設本防其漸作法於儉其敝猶奢今日之為實繫聖慮而況陛下尊奉兩宮與仁宗事體不同且虞倖進之臣漸陳無益之計臣愚欲乞陛下沈機慮始臨事制宜俯畢三年之喪首罷十閣之制德音遂發人

心自悅矧復舉動之間使人窺伺莫及豈止成一時之盛美將見垂萬世之休光區區之誠所願至矣

熙寧三年五月

上時為右諫議大夫御史中丞

上神宗乞放內人景氏

楊繪

臣竊聞內人景氏者曾在仁宗朝為御侍後放出嫁許宗賢近已聽離却召入內者臣竊以文武之政治於衽席家人之道脩於近小而況已經從良豈可復塵於禁掖哉伏乞放之於外以清物議

治平四年十月
上時知諫院

上哲宗乞進德愛身

范祖禹

臣伏見陛下嗣位以來端拱淵默專意學問臣侍經席於今累年陛下天縱生知聖德純茂接對臣下日月如一未嘗小有差失此實上天眷佑皇家保育生民宗廟社稷無疆之福也恭惟太祖皇帝肇造區夏櫛風沐雨削平僭亂以立子孫萬世之基傳之太宗至于真宗遂致太平仁宗年十三即大位章獻明肅太后安定邦家調護聖性是以四十二年之間德澤深結於民天下至今

思慕不忘英宗自藩邸入繼大統四海之內同心愛戴
先帝勵精求治宵衣旰食躬勤萬事十有九年不幸早
棄天下陛下年始十歲嗣登大位當此之時人心慄慄
憂危萬端幸賴太皇太后保佑扶持勤濟艱難斥退凶
邪登進忠良詔令所至百姓歡呼鼓舞數年以來中外
晏然北狄西戎無不從順此皆太皇太后之德也臣不
知陛下將何以報之臣竊思陛下所以報之惟在於進
德愛身而已陛下進德則為太平高世之主光顯祖宗

之烈發揚文母之訓使天下之人皆欣然曰祖宗之德
太皇太后之力如此則豈惟皇天祖宗饗佑陛下太皇
太后亦不虛勤勞矣陛下愛身則無疾疢不貽太皇太
后之憂武伯問孝孔子曰父母唯其疾之憂夫父母之
憂莫切於子孫之有疾疢他日陛下有子當自知之陛
下若不進德不愛身雖極四海九州之養亦未足為孝
也臣自今秋聞外人言陛下於後宮已有所近幸臣初
聞之不以為信數月以來傳者益多或云已有懷娠將

誕育者言之所起必有其端臣誠至愚不能不惑故敢
先事懇切言之陛下內承慈訓外勤聖學方當祇畏以
事天地誠孝以奉宗廟思六聖之勤勞念帝業之艱難
四方之人無不延頸舉踵注目傾耳觀聽陛下德業之
光名譽之隆以想望太平陛下可不謹哉今陛下未建
中宮而先近幸左右好色伐性傷於太早年少之時血
氣未定戒之在色言人少時血氣未定而先傷伐根本
則損壽考之福故君子戒之陛下今年十四歲而生於

十二月其實猶十三歲也豈近女色之時乎陛下上承
天地宗廟社稷之重守祖宗百三十年基業為億兆之
人父母豈可不愛惜聖體哉孟子曰事孰為大事親為
大守孰為大守身為大守身所以事親也愛身所以愛
天下也陛下上有太皇太后皇太后休戚皆繫於陛下
之一身豈可不愛惜聖體哉中庸曰君子之道本諸身
未有不先愛身而可以進道者也陛下方嚮學問躬儒
術欲為堯舜禹湯文武成康之君堯舜禹湯文武之君

未有不勤而成者也昔先帝年十五六講學東宮一言一動天下傳之是以多才多藝羣臣莫及今陛下聖學天下未有所聞而先以嗜慾聞於天下此臣之所甚憂也陛下有上聖之性必行上聖之事有上聖之位必求上聖之名豈可不愛聖體哉方今羣臣之心萬民之情正望朝廷如天聖以來所願陛下法則仁宗而已祖宗天下百三十年如寶器之無缺陛下行純德備如美玉之無瑕臣竊為陛下寶之惜之愛之重之陛下豈可不

愛惜聖體哉臣聞仁宗未納皇后以前未嘗近幸後宮
是以氣體康實在位最久臣今觀陛下氣怯恐不能如
仁宗少時豈可不愛惜聖體哉前世人君多所經歷乃
能周知天下之情今陛下生長深宮稼穡艱難未知也
人之情偽未見也國家政事未習也六經聖人之言未
盡讀也前世興亡之戒未盡閱也天下至大萬事至衆
何所不關聖慮豈可不愛惜聖體哉古人有言後宮盛
色則賢者隱處佞人用事則諫臣杜口陛下春秋鼎盛

方當崇經術邇端士崇尚素朴屏去紛華不宜先留意女色使天下失望以啓小人之心何則陛下如好德則賢人皆動其心欲助陛下之德而圖天下治安故於陛下有益陛下如好色則小人皆動其心欲奉陛下之欲而圖一身富貴故於陛下有損賢人進則治小人進則亂不可不謹也陛下於此二者將何擇焉昔漢成帝自為太子時以好色聞其後逸欲無節終為漢室昏亂之主漢之基業由成帝而壞豈可不謹其細哉唐太宗欲

納鄭仁基女魏徵諫而止之憲宗時教坊使稱密詔選
良家子納禁中李絳上疏乃悉還之文宗沒李孝本女
入宮魏謩諫即出之古之忠臣愛君必拂其邪心防其
嗜欲置君於無過之地使天下莫得而非議也人君所
愛莫切於身人臣亦莫切於愛君之身臣濫備勸講以
輔導聖德為職懷此憂慮已二三年不能言於未然致
陛下已有聲聽流聞於外此臣之罪也臣今若不言他
日陛下或專意聲色綱紀壞亂政事荒僻使天下以陛

下為逸欲之主則臣之罪豈勝其責雖悔恨萬狀何所
及哉伏望陛下察臣之言專精一意勉強學問日新德
業無時逸豫事親則思孝居處則思敬動作則思禮祭
祀則思誠服用則思儉養民則思仁使人則思恕心則
思道視則思正當食則思天下之饑當衣則思天下之
寒陛下每思及此而強學不已則將以道德為麗以仁
義為美豈聲色之可移哉唯陛下抑情制欲以愛養聖
體為先則動植之類無不蒙福生靈幸甚臣不勝拳拳

愛君之心

元祐四年十二月上
時為給事中侍講

上宣仁皇后乞保護聖體

范祖禹

臣伏見陛下臨御天下于今五年昧爽聽朝親斷萬事
所以勞心竭力者凡皆為祖宗社稷億兆人民將以太
平天下付之皇帝也臣愚竊謂陛下憂勤天下之事必
先憂天下之本愛養四方之民必愛一人之身夫一人
之身天下之本也孟子曰天下之本在國國之本在家
家之本在身天下安危繫於人君之一身身安則天下

安天下治亂出於人君之一心心正則天下正欲安天下必先安身欲正天下必先正心此二者當今之急務久遠之計慮也陛下內保佑聖躬調護起居外成就睿德勉進學問前此未嘗聞有纖毫之失今之所聞則異於前外議籍籍皆謂皇帝已近女色後宮將有就館者有識聞之無不寒心皇帝今年十四其實猶十三歲耳千金之家有十三歲之子猶不肯使近女色而況於萬乘之主乎陛下愛子孫而不留意於此非愛子孫之道也

譬如美木方長正當封植培壅以待其蔽日凌雲若戕伐其根豈不害哉臣嘗見司馬光言章獻明肅太后保護仁宗皇帝最為有法自即位以後未納皇后以前仁宗居處不離章獻卧內所以聖體充實在位歷年長久章獻於仁宗此功最大臣考之國史仁宗在乳褓章獻使章惠太后護視章獻臨朝仁宗起居飲食章惠必與之俱所以保佑扶持恩意勤備然則章惠保護仁宗乃章獻太后之意今陛下臨朝日有萬幾至於左右護視

皇帝臣不知有如章惠者乎若未能如章惠則陛下豈得不留聖意也陛下以朝事責宰相以邊事責將帥人君闕失羣臣邪正責諫官御史皇帝學問責講讀官若朝事不治宰相之罪也邊鄙不寧將帥之罪也人君闕失不知羣臣邪正不分諫官御史之罪也皇帝學問不進臣等之罪也至于皇帝早夜起居之節嗜欲之際此最切身之事豈可無任其責者乎陛下博覽史冊洞知古今古之帝王何嘗不以女色損壽考之福惟傷於太

早敗於無節耳思之至此可為切骨之戒臣所以不避
誅戮為陛下言之伏望陛下與皇太后太妃詳論此事
有損聖德不益聖體宜戒敕保傅令以章憲為法今聖
心已有所知雖不能防於未形猶可以止其將然俟中
宮既建然後漸廣繼嗣之路則陛下亦可以不勞聖慮
矣今若不知止節女色爭進數年之後敗德亂政無所
不有陛下雖欲悔之豈可及乎臣竊觀皇帝天質純粹
有上聖之資年益長則宜德益進方當嚮學以養聖功

天下引領以望輝光之新傾耳以聽名譽之隆聰明之
開發睿智之深遠皆繫於十五六之時不可失也陛下
必欲皇帝氣體康強德性成就以為宗社無疆之福莫
切於今日矣不宜先以好色聞於天下失衆庶之望臣
所以拳拳而不能已也惟陛下深思遠慮察臣狂瞽之

言

元祐四年
十二月上

同上

范祖禹

臣於今月二十七日至門下省見宰臣呂大防諭臣二

十四日面奉聖旨兩諫議并臣所言後宮御幸無此事者臣等所聞外議皆是虛傳陛下恕臣狂愚不賜誅責復蒙宣諭令臣具委臣且喜且懼不能自勝實天下幸甚然臣所言皇帝進德愛身所宜常以為戒太皇太后保護皇帝安身正心久遠之慮亦願因而勿忘今外議雖虛亦足為先事之戒也臣竊惟皇帝有上聖之資方養德嚮學涵育仁義臣侍經左右而有聞於道路實懷私憂是以不存形迹不知忌諱發於誠心愛上不敢避

妄言之罪凡事言於未然則誠為過慮及其已然則又無及雖言無益陛下寧受未然之言勿使臣等有無及之悔因聞虛言以為實戒則四海生靈動植之類永被其福臣蒙寬宥罪戾無任恐懼喜幸之至伏緣聖旨令大防諭臣合具奏知

元祐四年十二月上

上哲宗再論進德愛身

劉安世

臣伏自前月末聞聖旨權罷講筵是時近龍興節意謂將有燕饗是以暫輟邇英之幸用施慶禮今復半月別

無政事亦非有前歲大雪苦寒之故而罷之臣久不得望見清光固已疑之矣迺者民間喧傳禁中見求乳母竊謂陛下富於春秋尚未納后紛華盛麗之好必不能動蕩淵衷雖聞私議未嘗輒信近日傳者益衆考之頗有實狀臣忝備言職當諫其漸伏惟皇帝陛下天賜睿聖纂承大業太皇太后陛下慈仁正順保佑備至覆載之內莫不傾耳拭目以望風化而或者之言乃謂陛下稍疎先王之經典寢近後庭之女寵此聲流播實損聖

德昔者堯之受命惟以天下為憂而不敢以位為樂成
湯不邇聲色不殖貨利著之方冊萬世稱誦皇帝陛下
不可以不勉太皇太后不可以不勸伏望聖慈為宗廟
社稷之大計清閒之燕頻御經帷仍引近臣與之論議
前古治亂之要當今政事之宜悉俾開陳以助聖學無
溺於所愛而忘其所可戒天下幸甚

元祐四年十二月
上時為左諫議大

夫

同前係第二狀

劉安世

臣今月二十七日給事中范祖禹至本廳密傳宰臣呂
大防所聞德音諭臣所論後宮事實未嘗有者稽首承
命感抃交集臣歷觀前世之主鮮有不以聲色為累至
於近之太早御之無節則又不能保固真源增益壽考
聖賢所戒可為寒心且世俗之間粗有百金之產猶知
愛其子孫以為嗣續之託而况國朝百三十年之太平
六聖憂勤積累世之基業陛下繼而有之可不自愛自
重以為宗廟社稷無窮之計乎臣誤蒙聖恩擢寘諫列

使陛下日新之德未有以大著於四海而親近女寵之
謗先播於衆口臣雖愚暗亦深憂之所以不避譴訶先
事進戒若陛下實未嘗為則臣之所言猶不失諫官之
職若陛下萬一有之則臣之進說已為後時雖不敢逃
曠官之誅顧已何補於事惟冀陛下愛身進德留意學
問清心寡慾增厚福基臣不勝惓惓愛君之至

元祐四年十二月

月上時為左
諫議大夫

上哲宗論內車子爭道亂行
蘇軾

臣謹按漢成帝郊祠甘泉泰畤汾陰后土而趙昭儀常從在屬車間時揚雄待詔承明奏賦以諷其略曰想西王母欣然而上壽兮屏玉女而却處妃言婦女不當與齋祠之間也臣今備位夏官職在鹵簿准故事郊祀既成乘輿還齋宮改服通天冠絳紗袍敎坊鈞容作樂還內然後后妃之屬中道迎謁已非典禮而況方當祀事未畢而中宮掖庭得在勾陳豹尾之間乎竊見二聖崇奉大祀嚴恭寅畏度越古今四方來觀莫不悅服今車

駕方宿齋太廟而內中車子不避仗衛爭道亂行臣愚竊恐於觀望有損不敢不奏乞賜約束仍乞取問隨行

合干幹當人施行

元祐七年南郊軾以兵部尚書為鹵簿使上此奏

宋名臣奏議卷二十九

欽定四庫全書

宋名臣奏議卷三十

宋趙汝愚編

帝系門

皇太子上

上眞宗乞早建儲闈

田錫

臣竊觀唐憲宗即位改元元和四年冬十月御宣政樓冊皇太子又按李絳論事集元和三年翰林學士李絳

等上言曰古先哲王以天下為大器知一人不可以獨理四海不可以無本故立太子以副已設百司以分職然後人心大定宗社永寧有國家者不易之道也陛下嗣膺大寶四年于茲矣而儲闈未建典冊不行是開窺覷之端垂重謹之義非所以承宗廟重社稷也憲宗依所請下制所司擇日備禮冊命今陛下自纂承大位改元以來五年于茲矣儲闈未建典冊不行豈不慮窺覷之端豈不思重謹之義宜速以宗社永寧為圖也

咸平元年

上時為侍御
史知雜事

上仁宗乞遴擇宗親試以職務

張述

臣聞漆室之女有憂國之心倚檻而嘆臣位於朝二十
五年而區區之慮不蚤為陛下建長世之策是漆室之
不若也臣實憂之有生之命繫於宗廟社稷之重而以
繼嗣為之本匹夫匹婦有百金之產猶能定謀託後事
出于素況有天下者哉建隆乾德之臣子孰不願太祖

皇帝享年億萬者而端拱天禧之臣子其心亦莫不若此然天地有運行日月有盈昃陰陽之數有俊有章氣至而回事極而變理之必然者也藝祖以神器付太宗太宗以傳真宗真宗以傳陛下陛下承三聖之業傳之于千萬年斯為孝矣而春秋十四宗廟社稷之繼未有託焉此臣所以夙夜彷徨而憂也陛下知此矣而以嫌疑不決非孝也羣臣知此矣而以避諱不言非忠也陛下享天下之貴而不自怠有天下之富而不自侈過成

康文景遠矣，謂宜默祈天地，嶽瀆分寵六宮，用均愛施。或未之獲，則遴擇宗親，才而賢者，異其禮秩，試以職務。俾內外知聖心有所屬，則天下大幸。

皇祐五年上時
為太常博士

同前

係第二狀

張述

臣聞明兩作離，大人以繼明照于四方。離為日君象也。二明相繼，故能久照。東昇西沒，一晝一夜，數之常也。陛下御天下，將三紀，是日之正中，也而未聞以繼照為慮。臣誠疑之。夫嗣不早定，則有一旦之憂，而貽萬世之患。歷

觀前世事出倉猝則或宮闈出令或宦官主謀或姦臣
首議貪孩童以久其政冀闇昧以竊其權安危之機發
於頃刻而朝議恬不為計豈不危哉

至和元年上

上仁宗乞參考祖宗故事以定大計

范鎮

臣伏惟陛下置諫官者為宗廟社稷計也諫官而不以
宗廟社稷計事陛下者是不知諫官之任也陛下不以
臣愚任之諫官臣敢不以宗廟社稷計獻于陛下乎二

月中臣使契丹還過河北河北之人籍籍紛紛皆謂陛下
方不豫時有言曰我為宗廟社稷計以廣孝憂勞而
成此疾陛下所謂宗廟社稷計而憂且勞者得非皇嗣
未立乎是時中外皇皇莫知所為而陛下以宗廟社稷
為念是陛下之計慮至深且明也今陛下既已平復御
殿聽政願推向者之言而終行之行之之術非明則不
審非果則不決惟審與決而宗廟社稷之計定矣方今
祖宗後裔蕃衍盛大信厚篤實伏惟陛下擇其尤賢者

優其禮數試之以政與圖天下之事以係天下人心異時誕育皇嗣復遣還邸則真宗皇帝時故事是也初周王既薨真宗皇帝取宗室子養之宮中者天下之大慮也太祖皇帝捨其子而立太宗皇帝者天下之大公也伏惟陛下觀太祖皇帝之公心考真宗皇帝時故事斷于聖心以幸天下臣不勝大願臣考之于昔參之于今謀之于心書之于䟽疏成而累月不上者大懼無益于事死今之世以累陛下之明伏惟赦臣萬死之罪審之

決之以定宗廟社稷之至計非獨臣蒙更生之賜乃天下之心也不勝區區之愚

嘉祐元年五月
上時知諫院

同前 係第四狀

范鎮

臣聞傳曰決者智之君需者事之賊蓋言有所需待而決則賊於事也季文子三思而後行孔子曰再斯可矣何者再思則是非定至于三則惑况過于三者乎則是非已定而復思之者惑也孔子之所不與也臣近奏乞參考祖宗故事選宗室子優其禮數以係天下人心埃

有聖嗣復遣還邸此是非之至辨而無可惑者及今月
餘不決故天雨而不止雲陰而不解此是應也陛下方
不豫時尚不忘宗廟社稷之計而形於言今已平復肯
忘而不行之耶必不然也臣恐大臣不為陛下推明之
爾陛下恭事宗廟仁覆海內上天之報必生聖嗣臣今
所請乃祖宗故事以權係天下人心者何惑而不為之
乎伏惟上觀天意久雨之變速加處定以示中外臣不

勝大願

嘉祐元年
五月上

上仁宗論天下之本貴於前定

趙抃

臣聞聖人之制變不可無權宜天下之能事不可失機會至於去禍以歸福却亂以成治救亡以圖存轉危以置安者用權宜適機會也向者伏覩陛下聖體偶一違豫中外人心莫不動搖賴宗廟社稷之降靈天地神明之垂祐四海蒙福宸躬寢康然猶上有謫見之文迨無虛月下有妖言之俗至于再三天其或者豈非以陛下皇

嗣未立人心未有所係垂厥祥異明白丁寧警誡陛下
意欲陛下深思遠圖亟事所為而然也權宜也機會也
今其時矣書曰一人元良萬邦以貞易曰大人以繼明
照于四方叔孫通以謂天下之本柰何以天下為戲韓愈
亦曰前定可以守法不前定則爭且亂臣不勝大願願
陛下思所以答謫見妖言之警誡思所以固三聖百載
之基業思所以安中外臣庶之憂惑思所以破姦雄陰
賊之窺覷斷宸衷發天意擇用宗室賢善子弟或教育

宮闈或封建任使左右以良士輔導以正人磐石維城
根本深固有是二者惟陛下示天下以至公而擇焉伏
惟陛下春秋富盛福壽延洪一旦皇子慶誕少陽位正
儲貳事體何損權宜方今施為且適機會轉禍亂危亡
將然之勢為福治安存無疆之基豈不盛哉豈不休哉
臣職有言責計無家為戴陛下之恩極泰山之重顧愚
臣之命等鴻毛之輕儻一毫有益於朝廷則萬死甘從
於鼎鑊干冒旒冕臣無任納忠待罪激切屏營之至
嘉祐

元年六月上時
為殿中侍御史

上仁宗乞謹擇儲貳或典宿衛尹京邑以鎮

安人心

司馬光

臣竊以人臣之進言捨其急而議其緩則言益繁而用益寡人君之聽納忽其大而謹其細則心益勞而功益淺明主不惡逆耳之言以察治亂之原忠臣不避滅身之禍以論安危之本是以上下交泰而事業光美也臣竊見陛下自首春以來聖體小有不康天下之人側足而立

累氣而息恟恟憂懼若蹈冰炭間者雖已痊平而民間猶有妄為訛言以相警動者雖有司以嚴刑束之彼口不得言中心惶惶何所不慮耶陛下胡不試思其所以然者何哉豈非儲貳者天下之根本根本未定則衆心不安也賈誼有言抱火措之積薪之下而寢其上火未及然因謂之安當誼之時漢孝文帝春秋鼎盛有孝景以為之太子中外又安公私富溢誼猶有是言使誼處於今日當云何哉陛下好學多聞博覽經史試以前古

之事質之治亂安危之幾何嘗不由繼嗣哉得其人則治不得其人則亂分先定則安不先定則危此明白之理皎然如日得失之機間不容髮於朝廷至大至急之務孰先於此而陛下晏然不以為憂羣臣愛身莫以為言此臣所以日夜痛心疾首忘其身之疎賤而不顧鼎鑊之罪者也伏惟陛下哀而察之今夫細民之家有百金之寶猶擇親戚可信任者使謹守之況天下之大乎三代之王以至二漢所以能享天之祿若是其久者豈

非皆親任九族以為藩輔乎使親者猶不可信則疎者庸足恃乎臣竊惟陛下天性純孝振古無倫事無大小關於祖宗者未嘗不勤身苦體小心翼翼以奉承之況所受祖宗光明盛大之基業豈可不為之深思遠慮措之安平堅固之地以保萬世無疆之休哉臣聞天子之孝非若衆庶止於養親而已蓋將謹守前人之業而傳於無窮然後為孝也故經稱天子之孝曰德教加於百姓刑於四海諸侯之孝曰保其社稷而和其民人卿大

夫之孝曰守其宗廟士之孝曰保其祿位而守其祭祀
庶人之孝曰謹身節用以養父母此皆聖人之言非臣
之狂瞽也今陛下所以奉事祖宗其道至矣若獨於此
未留睿意早定大議則鄉時純孝巍巍之德皆無益矣
此天下所共為陛下重惜非特愚臣而已臣聞禮大宗
無子則同宗為之後為之後者為之子也故為人後者
事其所後禮皆如父所以尊尊而親親也伏惟祖宗受
天明命功德在人本支百世子孫千億而陛下未有皇

嗣人心憂危伏望陛下深念祖宗之艱難基業之闕美
神器之大寶蒼生之重望勿聽苟且之言勿從因循之
計斷自聖志昭然勿疑謹擇宗室之中聰明剛正孝友
仁慈者使攝居儲貳之位以俟皇嗣之生退居藩服儻
聖意未欲然者或且使之輔政或典宿衛或尹京邑亦
足以鎮安天下之心如此則天神地祇宗廟社稷實共
賴陛下聖明之德況羣臣兆民其誰不歡呼鼓舞乎昔
魯漆室之女憂魯君老太子幼彼匹婦也猶知憂國家

之難蓋以魯國有難則身必與焉故也況臣食陛下之祿立陛下之朝又得承乏典冊之府比於漆室之女斯亦重矣誠不忍坐視國家至大至急之憂而隱嘿不言誠知言責不在臣言之適足自禍然而必言者萬一冀陛下采而聽之則臣於國家譬如螻蟻而為陛下建萬世無窮之基救四海生民之命臣榮多矣願陛下勿以臣人微位賤謂之狂狷而忽之試以臣言自為聖意延問大臣忠於社稷者儻以為非臣請伏妄言之誅儻以

為是願陛下決志而速行之焚臣此奏勿以示外足以
明臣非敢徼冀毫釐之幸也虞書曰勅天之命惟時惟
幾陛下當此之時變危為安變亂為治易於反掌若失
時不斷使天下之人有以議陛下之純孝者則臣雖欲
畢命捐軀以報陛下亦無及已臣不勝區區憤懣之誠
干冒冕旒伏地待罪

嘉祐元年六月上時以
集賢校理通判并州

上仁宗乞歷選宜為嗣者
龐籍

臣伏以中外之任各有分局職外陳事皆為出位在臣

則不然早自寒儒偶升朝序荷陛下千世之遇寘于侍
從付之權任遂登樞府逮冠台司臣之推愚進無他路
凡在恩擢莫非帝力今身已頽憊猶居一方上將之位
則國家大事敢以守屏自外忍默不言上負大恩慙責
重矣恭惟陛下至聖臨御三紀日謹一日德全業大憂
勤機務焦勞夙夜今春之初偶嬰微疹萬方臣庶心如
焚灼祈禱穹昊冀集福聖躬天地降休廟社垂慶藥劑
有喜亟臻平復壽康之永人神有賴然臣今昧萬死而

思有所陳者蓋以陛下儲嗣未立宮坊虛位誠願陛下
深思祖宗統緒之重下察臣民繫望之懇發日之明親
加精慮歷選宗室宜為嗣者速決聖斷制命一出四海
懽抃天序既定羣心大安如此則陛下增基業之固奉
宗廟之孝無大於此也至如天禧之時先帝違豫溥率
之誠雖懷憂戚而中外帖然安心者以陛下在東宮故
也此理昭昭於耳目矣伏見唐世方鎮之臣上議諸宮
者數人當時不以為非而並蒙採用遂得福歸王室況

臣感主之深愛君之切苟以益國而死愈於負恩而生所以冒重禍而不疑不悔也且臣年垂七十逼於休退固無他希冀惟陛下保萬世之業蒙無窮之幸乃臣之大願矣瀝血上控祈賜裁擇不勝輸誠待罪之至

嘉祐元年

上時以觀文殿學士昭德軍節度使知并州

上仁宗論水災乞速定副貳之位係第六狀

范鎮

臣伏見天下以水災奏者日有十數都城大水天雨不

止所謂水不潤下也傳曰簡宗廟不禱祠廢祭祀逆天時則水不潤下陛下恭事天地神祇肅祇祖宗山川之祀罔不秩舉至於號令必順天時也非廢祭祀也非不禱祠也然而上天出此變者曉諭陛下以簡宗廟乎陛下即位以來虛副貳之位三十五年矣臣近奏擇宗子賢者優其禮數試之以政以係天下人心竢有聖嗣復遣還邸及今兩月餘不行正謂簡宗廟也此變所以發也伏惟陛下深念宗廟之重必有副貳以臣前所上

章降付執政大臣速為裁定以塞天變

嘉祐元年六月
上時知諫院

同前

李大臨

臣竊以比來大雨入都門壞廬舍溺人民祖宗以來未
之有也謹按漢書五行志曰簡宗祀不禱祠則水不潤
下今朝廷祭祀非不恭時享非不至而反謂簡慢者何
皇嗣未立主鬯有闕故也夫水萬物之本太子天下之
本今天下之根本未立上天深示災變伏望陛下鑒天
之戒早擇儲嗣以前定天下之心古者天子即位必有

儲副以受宗廟易曰主器者莫若長子又曰明兩作離大
人以繼明照于四方是天子必有儲副而天下獲安今儲
副未定祭祀幾廢故天之示變深切著明也伏乞陛下無
逆天時為社稷蒼生留意焉臣之朴忠憂國大計昧死
以聞

嘉祐元年上時
為秘閣校理

上仁宗乞立太祖太宗之曾孫

吳奎

臣聞王者以社稷為本宗廟為重社稷必有奉宗廟必

有主今陛下在位三十四年而嗣續未立天地祖宗開
發聖意不然何故陛下無大過朝廷無甚失輒降如此
之災異乎在禮太宗無嗣則擇支子之賢者漢成之於
哀帝孝和之於安帝皆兄弟之子也若以昭穆言之則
太祖太宗之曾孫以近親言之則太宗之曾孫陛下所
宜建立用繫四海之心者也陛下春秋猶盛竝有皇子
則退所為後者頗優其禮於宗室臣子之心誰曰不然
陛下勿聽陰邪巧計以誤大事假如倉卒之際柄有所

歸致社稷宗廟不血食書之史冊為萬世憤臣不願陛下以聖明之質當危亡之比也此事不宜優游願速裁定之不速必有姦人陰賊其間然亦不獨陛下之過輔弼之臣未聞力爭致宗祀無本鬱結羣望感名沴氣毒流天下所宜深罪推之咎罰無大于此

嘉祐元年上時知制誥

上仁宗論根本未建

係第二狀

司馬光

臣先於六月十九日輒以瞽言干犯聖聽伏地傾耳以

俟明詔於今月餘一無所聞陛下寬仁不加誅於狂愚之臣然亦未賜采納臣竊自痛人品猥細言語訥不能發明國家安危大體致陛下輕而棄之此皆臣之罪也雖然臣性誠愚位誠賤而意誠忠語誠切願陛下不以人之愚賤而廢忠切之言少留聖心於宗廟社稷之至計則天下幸甚竊以國家者政有小事有緩急知所先後則功無不成議者或曰當今之務大而急者在於水災汎溢是大不然彼水災所傷不過汚下及濱河

之民若積雨既止有司少疏而塞之則民皆復業豈能為國家之患哉又曰然則在於穀帛窘乏是又不然夫以四海之富治平之久若養之有道用之有節使良有司治之穀帛不可勝用也豈能為國家之患哉又曰然則在於戎狄侵盜是又不然夫戎狄侵盜不過能驚擾邊鄙之民若禦之有道備之有謀可使朝貢相繼豈能為國家之患哉以臣之愚當今最大最急之患在於根本未建衆心危疑釋此不憂而顧憂彼三者是捨其肺

腑而救其四肢也不亦左乎借有高才之臣能復九河之道儲九年之食開千里之邊而本根未建猶無益也況復細於彼三事者烏足道哉今陛下聖體雖安四方之人未能遍知尚有疑懼者陛下不以此時早擇宗室之賢者使攝居儲副之位內以輔衛聖躬外以鎮安百姓萬一有狂妄之人出於意外喧譁驚衆雖知萬全無慮然亦豈可不過為之防哉臣竊意陛下聖智聰明洞照安危策慮已定而尚密之未欲宣示於外審或如此

亦恐不可何則今天下之人企踵而立扶耳而聽以須明詔之下然後人人自安又何待而密哉若以儲副體大非造次可定者或且使之輔政或典宿衛或尹京邑亦足以過禍難之原靖中外之意今安危之機間不容髮日失一日貴在及時而朝廷置之意外不為汲汲朝夕所議大抵皆目前常事非甚大而急者臣恐高拱雍容養成國家之患從而理之用力難矣此臣所以日夜區區寢不能安食不能飽不避死亡之誅進言不已者

也伏望陛下察其愚衷特賜詳擇臣前日所奏及今狀內事理稍有可施行者乞決計而速行之以安天下元元之心然後理臣僭妄建言之罪不敢辭也

嘉祐元年八月上時

通判
并州

上仁宗論彗出主兵乞速定大議

係第七狀

范鎮

臣伏見五月二十四日昏時二星相繼西流一出天江一出天市出天江者主大水出天市者主散財當是時

朝廷不知觀天之變以圖消復又不為防以備其災纔
及一月而都城大水居民室廬及軍營漂壞者不知幾
十萬區大變之不虛發也如此近日以來彗星出東方
孛于七星其色正白七星主急兵白色亦主兵天意若
告陛下將有急兵至欲陛下與大臣相救儆懼以求消
復之術不可晏然復如前日也陛下自正月不豫至于
今二百餘日既已平復然羣臣稀得進者又不與語天
下大計天下之人其心皇皇所以感動上天之變也方

此時豈無乘間觀釁起為盜賊如大水之入都城者乎
陛下即位三十五年以納諫為德以畏天為心至于小
小論議未嘗不虛懷開納今乃宗廟社稷之至計反拒
諫而不用違天而不戒乎臣職當言不敢愛死默默以
負陛下陛下以臣言為然乞以臣前所上章與大臣速
定大議以臣言為不然乞加臣萬死之罪何者陛下素
有納諫之美因臣奏疏使陛下有拒諫之名臣更不敢
復奉朝請謹閉門以待萬死之罪

嘉祐元年八月
上時知諫院

同前 係第九狀

范鎮

臣伏見天禧三年六月彗星見未幾而冊陛下為皇太子方是時真宗皇帝只有陛下一人天下人心已有所係然真宗皇帝遽立陛下為皇太子者欲預定其分以塞覬覦之路也非私於陛下也為宗廟社稷之計與天譴之變皆當然也今陛下未有皇嗣天下人心無有所係故天初見流星繼以大水告陛下以簡宗廟之罰陛下君臣不知覺悟故天出彗以告陛下而陛下君臣晏

然復如前時此臣當言之責所以恐懼而待罪也初流星示變時大臣豈意必有大水乎及大水入都城大臣親領徒役以捍水患今大水已定而不知致大水之本由簡宗廟而不為宗廟計故天又出彗也彗之變主急兵大臣又不知先定大計以備兵變及兵如水之至而後親捍之雖勤勞如捍水之時亦無益矣陛下為民父母視民有厭溺之患又忍使遭戮辱之禍而不為宗廟社稷計以答天譴乎

嘉祐元年
八月上

上仁宗乞早定至策

係第三狀

司馬光

臣先於六月十九日八月一日兩曾上言乞擇宗室賢者進而用之蓋以上則輔衛聖躬下則鎮安百姓迄今未聞聖朝少垂采聽臣誠愚昧不達國家高遠之意若臣所言非耶當明治其罪以示天下若其是耶亦謂聖心不宜棄忽豈可直以臣之愚賤不察其言若投羽毛於滄海之中杳然莫知其所之豈疎遠所望哉臣不勝

憤懣敢復剖析肝膽陳布以聞雖抵罪萬死亦無怨悔
臣聞書曰遠乃猷詩云猶之未遠是用大諫凡國家之
弊在於樂因循而多忌諱不於治安之時豫為長遠之
謀此患難所從而生也竊觀漢室以至有唐簡策所載
帝王即位則立太子此乃古今不易之道也其或謙遜
未暇則有司請之所以尊宗廟重社稷皆國家莫大之
慶未聞人主以為諱惡也及唐中葉以來人主始有惡
聞立嗣者羣臣莫敢發言言則刑戮隨之是以禍亂相

尋不可復振殊不知本強則茂基壯則安此乃國家所當深鑒而不足以為法也今天下之人上自公卿下至庶人苟有知識忠於國家者其心皆知當今之務無此為大無此為急而各畏忤旨之誅莫敢進言臣獨不敢愛犬馬之軀為陛下言之陛下豈可不少留聖意而聽察之耶臣嘗歷觀春秋以來迨至國初積一千六百餘年其間天下混一內外無患兵寢不用者不過四百餘年而已至如聖朝芟夷僭亂一統四海內平外順上安

下和使在朝在野之人自祖及孫耳目相傳不識戰鬪
蓋自上世以來治平之久未有若今之盛者也臣竊見
國家於州縣倉庫斗糧尺帛未嘗不嚴固局鏑擇人而
守之況如是融明閎茂之業豈可不謹擇親戚可信可
任者使助陛下守之乎此則賢愚之人所共為陛下重
惜者也陛下當此之時願指如意不早決至策以固萬
世不拔之基獨不念太祖太宗跋履山川經營天下真
宗宵衣旰食以致太平之艱難乎此臣所以夙夜遑遑

起則思之臥則夢之感嘆涕泗不能自已不避煩瀆之誅再三進言者也或者謂臣身賤居外而言朝廷之事侵官也臣愚以為治古諫諍無官自公卿大夫至於庶人百工商旅矇瞍聵無有不得言者所以達下情而察國政也若置官而守之非其官者皆不得言則下情壅而不通如是則國家雖有迫切之憂行道之人皆知之而在上者莫得聞也此其為害豈不深乎況臣食陛下之祿於今三世先臣以廉直恬退特為陛下所知擢

自孤微升之侍從此恩之重子子孫孫何時敢忘而又
陛下邇以水災親下明詔延訪中外勤求得失臣獨何
人身逢盛際捨此大節隱而不言其餘瑣碎何足道哉
抑又聞之元后作民父母陛下臣父也安有為人之子
見危而不告其父乎伏望陛下察臣區區之心不為私
其一身不惜少頃之間取臣前後所奏略賜省覽其中
萬一苟有可施行者乞以陛下之意斷而行之宣告中
外使遠近渙然無復憂疑則自然神靈悅於上而災異

伏衆庶悅於下而姦宄消至於草木昆蟲靡不蒙被其福其為功業豈不盛哉夫時者難得而易失惟陛下早

留神詳察

嘉祐元年九月
上時通判井州

上仁宗辭侍御史知雜事乞定大議

係第二

十狀

范鎮

臣待罪中蒙除知雜御史七降聖旨臣雖甚愚知陛下必以臣言為是然久而不知決者竊恐左右近習以為陛下已安不用為此以惑陛下是皆佞邪無識之人不

可不察古人所謂小人愛人以姑息者正謂此輩臣愚
謂陛下既安尤當為之以答天意天意報貺必蒙子孫
無疆之慶此天人相與之際必然之理願陛下黜小人
姑息之淺見察臣之至言則大臣不敢畏避必能盡力
輔佐陛下以為宗廟之計臣前後上章凡十九次竊恐
留中大臣不得盡見今具錄進呈乞付中書樞密大臣
同共參議有異議者乞與臣廷辨謂臣不然即乞明加
臣罪解臣言責臣之至情盡在於此

貼黃臣竊聞臣所上文字只降中書而樞密院絕不
與議伏緣茲事體大乞以臣前後所上章疏降付中
書樞密院令中書樞密大臣同共平章

鎮至和三年
五月初建議

至嘉祐元年十一月凡
二十狀竟辭言職不就

宋名臣奏議卷三十